

唐船人纔已押送未滿一朔又此捕捉每每押送其弊難支宜使防禦使從便  
放送備局覆奏以為既已拿獲方便放送事體未安今審則令譯院差定賁咨  
官押送鳳城此後荒唐船浮在洋中者不必驅入內洋以貽押送之弊 上從  
之○已丑憲府申前啓又言遂安郡守姜頊上年春稱以田稅錢民窮難辦請  
得本道詳定米分授銀店勒捧一萬一千餘兩所納田稅錢只是七千餘兩其  
餘盡歸私橐請罷職不叙 上不從○諫院申前啓又言判決事洪景濂年紀  
衰耗精神消亡聽斷之際厚招人言請遞差 上只從洪景濂事○庚寅夜艮  
方坤方有氣如火光○藥房入診○辛卯掌令宋思胤以姜頊事擬律失當引  
避不為退待仍申前啓姜頊請拿問定罪又言泰川縣有失印之事兵使裨將  
孔又聖稱有秘術跪於殿牌前合手詛呪且以匿名書投之路傍以為齋任金  
國賓等偷印自當治獄雜施淫刑終致經斃不可置而不問請其時縣監為先  
拿問孔又聖拿致京獄嚴覈社稷大祭時香盒下臺公然見失以香室所來香  
盒推移將事官負難免不察之失請其時壇司罷職 上只從姜頊以下三件  
事○下教曰眼患如此治方可緩溫水遠取必多泄氣而 先朝有已行之事  
欲為汲來試浴令內局問于諸醫以啓於是藥房問於諸醫以遠地汲來誠有